



Minggu, 19 Mei 2024

Ogen: Lukas 2: 21-32



Mpersembahkan Anak Man Tuhan



Tep-tep daerah lit budayana. Budaya enda la terlepasen arah kiniteken, janah nama ngaruh kubas caranta geluh, perayaken dingnen kebiaken si iumban i tengah-tengah masyarakat. Bali ras Maria ras Jusup orang tua Yesus, ia pe mpraktekken budaya dingnen kinitekenna dingnen mabai Yesus kubas kesemalen agama ras budaya si la terpisah i bas kalak Jahudi. I bas umur 8 wari bayi Yesus ibaba ku Rumah Pertoton guna i sunatken, jenari kenca usiana 40 wari ibaba ka Ia guna ipersembahkan selaku buah sulung. Maria ras Jusup pe erbahan persembahen pentahiren man Yesus. Kerina upacara e eme perintah turun temurun si ilakoken bangsa Israel guna mpebengket anak si tubuh i tengah-tengah kalak Jahudi jadi bagin bangsa perjanjian. Kai tujun si e, eme selaku pengakunta maka anak e pemere Dibata kap janah man anak-anak pe isehken perpadanen e (Kej.12:1-3). Anak e ibaba guna kitik-kitikna nari nggeluh i bas ketaaten nandangi perintah Tuhan. Ulih mpebengket anak kubas perpadanen Tuhan, segelah anak e jadi terang man bangsa-bangsa.

Tuhan kap terang e, i bas diri Yesus Kristus tangkas terangna man manusia. Upacara Tuhan Yesus isunat ras ipersembahkan i rumah pertoton jadi sada penginget kerna keleng ate Tuhan dingnen jadi usihen siarus ilakoken orang tua selampas-lampasna kenca ia mopusken anakna. Adi merincuh kin kita anakta jadi terang man bangsa-bangsa, man keluarga, maka sada ngenca dalanna e me mpersembahkan ia kubas Tuhan, bengket kubas ketaaten nandangi perintah Tuhan. Kiniteken si sejati teridah arah ketaaten. Kalak si ipasu-pasu Tuhan e me kalak si ngendesken geluhna man Dibata. Janah tanggung jawabta mabai anak e iperdiken bas paksana, ngajarkenca Kata Dibata, naruhkenca ku kebaktin-kebaktinna, dingnen mere usihen kerna sie, naruhkenca kubas pelajaran ngawan bas paksana, maka terjamin kegeluhenna.